

ACADEMIA MUSICAL TA BAI HABRI

ORANJESTAD (APA)
ASOMA conhuntamente cu Academia Musical di Aruba ta trahando intensamente pa e repaertura di e Academia pa dia 2 di october 1989.

Ta asina cu actualmente e Academia tin 6 maestro cu lo bai duna les di guitarra, piano, drums, bass, saxophone, flauta, trompet y latin percussion. Pues tur instrumento di importancia pa por toca den hotelnan.

E motibo principal ta pa frena e musiconan di exterior cu lo invadí Aruba ora tur e hotelnan nobo keda cla. Actualmente tin suficiente musicos pa yena tur e vacatura cu por presenta pero pa futuro cercano esaki lo ta difícil. E idea ta pa e alumnonan tin un preparacion musical basico caba y tin e deseo di toca den hotelnan. Normalmente un curso por

dura 5 año pero si e persona ta tocando caba como amateur y tin un base, por ehempel por lesa musica un poco y conoce su instrumento, e ora e maestronan por yude yega na un nivel aceptable dentro di un año pa dos año. Esnan mas avansá lo por termina e curso promer cu e hotelnan nobo cuminza habri.

Ta e intencion di ASOMA y Academia Musical di Aruba pa busca tur musiconan arubano cu ta bibando den exterior pa bin traha bek na nan pais. Ya caba tabata tin contacto cu varios cu ta biba na Hulanda. "Nos tin experiencia suficiente pa yuda nos hendenan y ora nos sa cu ta arubiano ta tocando na nos hotelnan nos cu nos cultura musical tin e oportunidad pa sobreviví. Nos leynan tey pa protehá nos", e presidente di ASOMA ta bisa den e comunicado di prensa.